



Tir Yimym

www.tirymim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymim@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8

NDA-i West Bengal aser Tamil Nadu
nung takok angutsü: Amit Shah

Saraswat-i Guwahati Masters nung
mezüngbuba super 100 title benogo

VOL. XXIII ISSUE NO. 62 (ADOK 62) DIMAPUR TENTONÜ (MONDAY) LUCHII (DECEMBER) 08, 2025

₹ 5.00

Hornbill Fest nung nisung lakh 1.13 denogo

Kohima, December 7, 2025 (TYO): 26 buba Hornbill Festival tenzüker anogo trokbuba tashi nung nisung 1,13,667 aruogo ta Directorate of Tourism, GoN-i ashi.

December 1 nungi 6, 2025 tashi domestic aser local tourists teimba ser benjung nung aden. Anogo trok tsüngda foreign tourist temi aika aruogo ta parnoki ashi.

Anogo trok tashi nung foreigners 1,645, domestic tourists 28,637 aser locals 83,385 liasü ta Directorate of Tourism-isa metetdaksü.

Taküm Hornbill Festival nung nisung teimtiba aruba anogoji Honibar liasü. Iba anogo nisung 22,786 aru aser parnok rongnung foreigners 205, domestic visitors 5,792 aser locals 16,789 liasü.

26 buba Hornbill Festival tenzüka anogo nung nisung 22,508, tananü 18,010, tasemnü 15,324, pezünü 15,753 aser pungunü 19,286 tashi aru.

Tanü Cultural Show nunghost ji Deputy Chief Minister Yanthungo Patton aser co-host ji Advisor & MLA Dr Kekhrielhoulie Yhome liasü.

Iba sentong nung tetushi süa

jaokertemji Secretary Ministry of Electronics and Information Technology S. Krishnan aser Spotify Head of Music and Podcast, India Bhruvank Vaidya na liasü.

Tanü sentong nung North Eastern State 8 nungi shilem agia liasü. Nagaland aser Meghalaya tenemtem nungi Manipur aser Mizoram lendenlen, Assam nung Brahmaputra nungi Arunachal Pradesh, Tripura aser Sikkim sobaliba senmangtem sayua liasü.

Mizoram nungeri Cheraw (Bamboo) Dance ia sayu, Arunachal Pradesh nungi Nyishi nungeri Juju Jaja Jaminja aser Manipur nungi Kabui Rongmei nungeri Duisha Laam (Waterfall Dance) ia sayu.

Maneni, Tripura nungi Chakma nungeri Bizu Dance, Meghalaya nungi Khasi nungeri Mastieh Dance, Sikkim nungi Bhutia nungeri Snow Lion Dance (Singhi Chham) aser Assam nungi Karbi nungeri Chong Kedam ia sayua liasü.

Iba sentong nungsa Nagaland tenüng nungi Lotha tsürtemi Nzanta aser Mungyanta ia sayu.

Iba sobaliba sentong ya North East Zone Cultural Centre, Dimapur (NEZCC) ajanga achayanga agi.

Kisama nung Sanitation Support Team ajanga mapa tajung inyaker

Dimapur, December 7, 2025 (TYO): Naga Heritage Village, Kisama nung 26 buba Hornbill Festival 2025 amungdang state sorkar kübok Sanitation Support Team ajanga kanga dang tongtipang mapa ka inyaker.

Sanitation Support Team nungi sanitation personnel 80 nungi 90 shi ka anogoshia benjung amungdak mapa lemezüksür aser parnoki anepdang 6:00 ako nungi nikongdang 6:00 ako tashi waste collection, segregation, sweeping inyaka tesem ajunga anepalur.

Naga Heritage Village, Kisama nung tongtipang tesemtem nung waste bins yuja lir saka nisung aika aruba ajanga jana timi meindoker. Ajisüaka Sanitation Support Team-i kanga dang meranga inyakba ajanga benjung amungdak merükmejua ayur.

Team coordinators-i benjung amungi arurtem dangi salem abenba den public dang jana timi endoktsü mepishia metetdaksüogo.

Benjungmung nung dang masü saka anogoshia merükmejua alitsüla ta parnokisa ayongzüko.

Assam Congress-i manifesto atema "Aspirational Boxes" campaign tenzük

Dibrugarh, December 7, 2025 (Agencies): Assam Pradesh Congress Committee (APCC)-i Honibarnü "Raijor Podulit, Raijor Congress" ta ser statewide outreach campaign tenzüko.

APCC-isa "Aspirational Boxes" sayaogo aser iba ajanga public tebilembatem bendener taruba Assembly elections atema manifesto yanglutsü.

Iba sentong ya Dibrugarh nung tenzüker aser APCC president Gaurav Gogoi, manifesto committee chairman Pradyut Bordoloi, Pranati Phukan, Prithvi Majhi, Paban Singh Ghatowar aser district president Bipul Rabha nungeri aden.

Iba sentong nung Eastern Assam nungi Tea worker groups, youth bodies, cultural

organisations, lawyers' associations aser social service groups aden.

"Congress-i kin shia nüngdakba ajak adenba roadmap ka aginür. Iba mapa ya tarutsü atema lir. Onoki manifesto nung nübortem ola aginür. Party züngsemtemi nisung ajak den ajuruteptsü aser itasen, mapa, lanur aser anogoshia tayongzükbatem indang tebilemtsütem bendentsü" ta Pradyut Bordoloi-i ashi.

"Congress-i nübortem dangi indangindanga organisational activities bener aoer. November 30 nungi tea gardens nung Health camps tenzüko. December 6 nungi kintem den ajuruteptsü tenzüko" ta Gaurav Gogoi-i ashi.

(Maneni tapak 2 nung...)

Nagaland Dy. CM T.R Zeliang-i longjemtsü aser putepshitsü ayongzüker



26 buba Hornbill Festival nung shilem ka ama Deobarnü Advent Christmas Devotional Service ayonga agidang Deputy Chief Minister T. R. Zeliang-i jempiba noksa nung angur.

Kohima, December 7, 2025 (TYO): Naga Heritage Village, Kisama nung 26 buba Hornbill Festival nung shilem ka ama Deobarnü Advent Christmas Devotional Service ayonga agiogo.

Iba sentong nung Nagaland Deputy Chief Minister T. R. Zeliang-i longjemtsü aser putepshitsü onük jembia liasü.

Iba sentong ya Nagaland Legislators' Christian Fellowship aser Nagaland Joint Christian Forum külemi yaritepa ayongzüker.

T. R. Zeliang-i Christmas tepela salem lemsatepdang "iba mongpu ajanga asenok dang telongjem bilemtetdaksür" ta ashi.

"Yisu asoba otsü nung teimla indang tesangwa kati nisung tapu balala ajak ka kümdaktsüba ashir. Nagaland-ia iba tangatetba sülen anidaktüsü kechiyong overground aser underground süang, telok balala lemsaba ajanga asenok tejakleni mouteter" ta pai ashi.

"Tsüngremi mapa meinyakra Nagaland nung teraksa tulu ajurutsü aser ozüng mali akümtsü" ta Zeliang-isa ashi.

"Nagaland Joint Christian Forum nung denominations balala

dena lir aser iba telongjem atema tenüngsang agütsür. Iba Forum ajanga Arogo nung dang masü saka loktiliba nung shilem ajak longjemtsü asoshi mapa inyaktüsü ayongzüker" ta paisa ashi.

"Kintem, sobaliba balala aser loktitem tsüngda amalitepa aser longjema aliba ajanga Nagaland lemsatsü melena tashi itdaktüsüla" ta Deputy Chief Minister-isa ayongzüker.

"Yohan 1:9-13 nung kechi tia ajurutsü memetetba lima ka nung Khrista aso saka pa ajanga teimla aser maitsü tasen ka bentsür aru. Iba ya tanü tensa den kanga tapet lir. Dimapur nung December 2 nungi 5 tashi Healing and Revival Festival nung nisung aika aden aser iba ajanga nübortemi Tsüngrem'er temoatsü aginüba sayur" ta paisa ashi.

Paisa sensotem dang temulung ajak agi Christmas agizüksü, tatok agütsüsü aser tarutsü atema tangatetba tajung ayutsü ayongzüker.

Iba sentong nung Nagaland Joint Christian Forum (NJCF) Secretary Rev. Moses Murry-i Christmas salem aben aser Tsüngrem, Chief Minister aser sentong ayongertem dang pelaba metetdaksü.

"December 2 nungi 5 tashi

Healing and Revival programme agidang Tsüngrem o angatsü atema nisung lakh 1 tema adenba osang angazüker, aser parnoki tanüla aser shi nung taneptsü angu. Iba ajanga Nagaland nung asentenshi kanga rondak nüngdakba sayur" ta Rev. Murry-isa ashi.

"Yisu Khrista asoba ya meimchir putiotsü nung tatalokba tongtipangtiba lir. Tammang agi sünga aliba alimai Tsüngremi tesangwa bener aru. Yohan 8:12 nung Khrista ya alima tesangwa ta shia lir aser iba nung ajemdaker Nagaland state nung lennirtem aser nübortem asohi temoatsü, shisatsü aser anema aliba taküm meshia sarasademer" ta Rev. Murry-isa ashi.

Iba sentong nung mendenji State Chaplain Rev Izieteilung Terieng liasü, Finance & property Secretary NBCC Rev Noksa Chio-i temoatsü meshia sarasadem aser Bible Society of India Kohima Bench President Those Kraho-i Lai azüng.

Sentong nungsa Treasurer NJCF Khontele Seb-i Naga nunger asoshi temoatsü meshia sarasadem aser Nagaland Pentecostal Mission Pastor Sunep Jamir-i tenüngsang agüja tembang.

NEC Secretary Bhalla-i Nagaland CineFest tenzüksüogo

Dimapur, December 7, 2025 (TYO): North Eastern Council (NEC) Government of India Secretary Satinder Kumar Bhalla-i December 6, 2025 nü Nagaland CineFest lapoktsüogo.

Iba benjung ya Bamboo Hall, Kisama nung lapok aser December 8, 2025 tashi alitsü.

CineFest ya Department of Information & Public Relations-i 'Celebrating Stories, Inspiring Minds' omen nung ajemdaker Ministry of Information & Broadcasting kübok National Film Development Corporation (NFDC) den yaritepa ayongzüker.

"Iba film festival ayongzüka atema department, film makers aser partners ajak dang pelar. Chief Minister Dr. Neiphiu Rio-i mangdang tulu ayuba ajanga Nagaland nung lanur sempettem ajungketer" ta Secretary Bhalla-i ashi.

"Hornbill festival mapang CineFest ayongba ajanga iba kuli agütsür aser iba ajanga Nagaland sorkari cinema asoshi bendanga agütsüba tali jangjadaktsür. Nagaland, Northeast aser linük nung tesem balala indang sobaliba senmang iba ajanga sayutsü" ta paisa ashi.

"Filmmaker-i kanga shisakaa yanglutsüla saka ozüng alema inyaksangshiba aser kiralongraba indang kangabo mesayutsüla. Cinema ya kanga tongtipang lir aser iba sabang ajanga nisung kati taküm nung ajangshiba ajak sayuteter. Iba sabang ajanga tepela, tejashi aser tebilembatem sayuteter aser otsütem shiteter" ta Bhalla-isa ashi.

"Cinema ya meimchirtem asoshi kanga tongtipang lir aser mapa inyakerem nem tenüngsang agütsür" ta paisa shisem.

"Cinema ya entertainment atema dang masü saka tanü lanurtem asoshi mapa tajung aika inyakteter. Cinema ya education sector nung lanu putu angazükdak ka lir aser Cinema ajanga tebilemtsütem lemsateper aser osang prokshir" ta paisa metetdaksü.

Bhalla-isa social media kümdanga amshitsü aser producer o director temi film yangludang kanga dang kümdanga aser tebilemtsü bena yanglutsü indang tekümdangtsü ashi.

Iba sentong nung Additional Secretary, IPR, Kusa Fithu-i tesentepertem pelaa agizük aser Lima

Sanglir-i direct asüba 'The Last Catch' aser Jepito H. Zhimomi-i direct asüba 'Feeling from the past' short films ana sayua liasü.

BasCon 8 Festival 2025 nung Abiogenesis-i shilem agi



Dimapur, Luchii/December 07 (TYO): Basar, Arunachal Pradesh nung December 6, 2025 nü BasCon 8 Festival 2025 tenzükba nung Nagaland nungi Naga folk fusion ken atener Abiogenesis-i shilem tajung agia liasü.

Basar jila nung tebour tajung Sii Riverside nung iba sentong ayongzüka lir, aser

Nagaland nungi iba kentener telok yagi 'Naga Howeymusic' yimya nung ken tena terepranger mulung atsür arua liasü.

Anogo pezü Basar Confluence ya 2017 nung Arunachal Pradesh nung sobaliba aser 'ecological' lokti adenshiba rongnung khenyongi balaka lir, kong art, music, craft,

sobaliba aser kin balala lungjemdaksür.

Abiogenesis-i iba benjongmung tenzükba anogo shilem agiba ya iba sentong ayonger aser adener temi tenüng sanga liasü.

Basar ya tebour tajung jila ka lir, koba Arunachal Pradesh kübok Leparada district nung lir aser Garo kin alir.

Hornbill Festival 2025 nung Arunachal entrepreneurs-i shilem tajung agir

Dimapur, Luchii/December 07 (TYO): 26 buba Hornbill Festival 2025 nung Arunachal Pradesh-i maneni shilem tajung agia par state nung adokba entrepreneurse temi sobaliba tajung, teka mapa aser creative industries sayua liasü. Shilem agir temi Arunachal Pradesh sorkar ajanga local enterprises temaba jenjangi ajungkettsü merangba, artisan nem tashi agütsüba aser indigenous oset atema national

market lingakes tuluba agütsüba indang sayu.

Item rongnung Khangam Jewellery-i Wancho kin indang sobaliba nung tera yanglur teka agi yangluba jewellery nung nüburtemi tali temulung agütsür.

Wancho tsür temi akhi mapang nungi brad yangluba ajanga ajungmesoa Khangam Jewellery-i indigenous artistry aser tanü asüng yimyatem amshia maitsü, sobaliba senmang wazüka ayur. Iba

brand yagi yimdak yimtsüng nung aliba tetsürtem aser zünger mapa mangu aliba tetsür nem, talisa school züngtur anena alirtem nem skill development ajanga mapa tajung jenti inyaker.

Arunachal Pradesh nungi entrepreneurs tem arua Hornbill Festival nung shilem agiba ajanga iba benjongmung tali lemladaksür aser sobaliba nung tera yanger inyakyim tasen adokdaksüba sayur.

MeitY Secretary-i state indang IT infrastructure nung yaritsü ashi



Hotel Vivor, Kohima nung December 7, 2025 nü senden ka amenba mapang tangokba noksa nung Advisor, Information Technology & Communication, Economics & Statistics and Evaluation, Government of Nagaland, H. Sethrongkyu Sangtam aser Secretary, Ministry of Electronics & Information Technology (MeitY), Government of India, S. Krishnan, IAS den ketdangsürtem angur.

Dimapur, Luchii/December 07 (TYO): Advisor, Information Technology & Communication, Economics & Statistics and Evaluation, Government of Nagaland, H. Sethrongkyu Sangtam aser Secretary, Ministry of Electronics & Information Technology (MeitY), Government of India, S. Krishnan, IAS na December 7, 2025 nü Hotel Vivor, Kohima nung senden ka mena liasü.

Iba senden nung Nagaland indang digital transformation, tang teinyakdak maparen balala nung terenlok aliba, capacity

building aser state tesem ajunga nung technology amshia sorkar mapa inyakba nung timtem ajuruba indang jembia liasü.

Iba mapang State sorkari digital governance infrastructure asoshi nukla yur technology tsütsü sentong balala inyakba indang Advisor Sethrongkyu Sangtam-i lemsatepa liasü.

Item rongnung AI-powered State Data Centre, State Cyber Security Operations Centre (SC-SOC), NagaChain amala dena lir.

IT sector nung State sorkari mapa tajung inyakba atema MeitY Secretary-i tenüngsang

agüja liasü.

Iba senden nung lemsatepba projects tem ya Cyber security, Data Governance aser Inclusive Digital Identity frameworks frameworks dak sendakba linük nükjidong den lirumedema lir ta pai ashi aser item temelenshi adokdaksüba sentongtem State-Centre lungjemer inyaksü nüngdaker ta ashi.

Secretary-isa IT infrastructure tashi itshitsü aser State-i lemsatepba ama tongtipang technology sentongtem tejakleni aotsü asoshi sorkar temulungtetba lir ta ashi.

Dimapur nung mejangjaba nisung tasü mang ka nguteta lir

Dimapur, Luchii/December 07 (TYO): Mejangjaba nisung (tebur aser Naga nunger masü) arishi küm 50-60 tsüngta tain ka Hotel Blue Bird, Dimapur anasa flyover tsünglanglen sür aliba Decem 6, 2025 nü nguteta liasü, ta Dimapur Police sangdong ka ajanga ashi.

Iba osang angazükli duty nung alirtem iba tesem bushia oa tasü mang meita repranga liasü. Nisungba ya blanket agi meyibanger anünglen tejak shir mejanga liasü.

Iba nisungba ya talidak ki makar aser mapang shia iba tesem nung mejanger, ta osang angazük. Tasü mang nung

ajitetsüsa tarak mongutet aser pa ya yasa-tzüra aser shirangba agi asü südi ta temulung melemteti lir.

Ozüng agi melaba maparen ajak tembangba sülen tasü mang ya PM examination/identification atema District Hospital Dimapur Morgue nung bener oa lir.

Nisungba ya t-shir sentsü tanak aser tula sentsü temesüng semer liasü. Kibur/kinunger/tembar temi Officer-in-Charge, East Police Station, Dimapur den Mobile No. 7085055020 ajanga tongteprateptsü ajungshir, ta sangdong ajangasa ashi.

Chümoukedima nung anogo asem Hornbill Bamboo Carnival tenzükogo

Dimapur, Luchii/December 07 (TYO): Nagaland Bamboo Resource Centre, Sovima, Chümoukedima nung December 7, 2025 nü Hornbill Bamboo Carnival 2025 tenzükogo.

Asemnü carnival ya Nagaland Bamboo Development Agency (NBDA) ajanga Hornbill Festival 2025 nung shilem ka ama Nagaland nung sungkum nung amendaka aliba sector ainba benjongtsü asoshi ayongzüük.

Iba benjong tenzükba sentong nung Member, NBDA, Mhonlumi Patton menden liasü aser sentong akhumdong ka ama Chairman, NBDA, Nuzota Swuro dena liasü.

Swuro-i jembidang Bamboo Carnival ya Hornbill Festival den lungjemtsü kota tongtipang ta asüba indang jembia aser iba yagi sungkum ya Green Gold ta State sorkar aser NBDA nati ajungkettsü mangdang aliba sayur, ta ashi.

Nagaland Bamboo Policy 2004 kübok 2005 küm Nagaland Bamboo Development Agency tenzükba aliba nung mezünpur aser shilem agir ajunga nem pai tenüngsang agüja liasü.

NBDA ajanga Nagaland tesem balala nung ali tasazük 45,621 hectares nung sungkum atemba aser National Bamboo Mission kübok ali tasazük 1,506 hectares nung block plantations yokba indang NBDA takok

lemsatepa liasü. NBDA ajanga saplings 24 lakh lema agütsüogo, ta pai ashi.

Pai sungkum tabu 26 den Bamboo Setum ka amenokba, Rural Bamboo Haats, Bamboo Bazaars amala market infrastructure agütsüba, nüburtem amshiba tesem, charcoal briquettes, agarbatti sticks, bamboo strips, venetian blinds aser structural treatments ama sungkum nung ajemdaker production units tem amenokba indanga shia liasü.

NBDA ajanga aluyimer, entrepreneurs aser artisans nem training agütsür aser linük nung aser international trade fairs nunga shilem agia market lingakes yanglutar, ta Swuro-i ashi.

Hornbill Bamboo Carnival nükjidong ya crafts aser kisü-jensüba nung bamboo dak teimla aliba ajungkettsü asoshi lir, ta pai ashi aser shilem agirtem dang angazütsü, teka amteptsü aser NBDA inyakyim nung yariteptsü ajungshi. Paisa Bamboo Research & Training Centre ka amenoktsü sentong aliba indanga sangdonga liasü. Er. M. Imkonglemba, Team Member, NBDA ajanga pela agizükba o jembidang, iba sentong nung sungkum dak sendakba crafts, arts aser artisans benjongtsü aser sungkum kota tongtipang ta asüba indang awareness prokshitsü asoshi lir ta ashi.

Assam Congress-i manifesto... (TAPAK 1 NUNGI...)

December tatemlen tashi nung APCC teloktemi state ajungalen sema senzütsü. Parnoki Eastern, Central aser Western Assam, Barak Valley aser Hill Districts asemtsü. Party lennirtemi aluyimertem, aayangertem, contractors, lanurtem aser tanga teloktem den ajuruteptsü.

"Tanü sorkar ketdangsübaren ya chuba yimli ka ama kümogo. Onük tila ka atema mapa nungi anentsür. Onoki nübor madak yimsü asütsüba masü saka tenzükünür" ta Gogoi-isa ashi.

Opposition party temi sangküm January nung joint convention ka linür. Iba ya November 12 nü alliance meeting

sülen agitsü ta paisa ashi.

APCC-i shishilembadak, community halls, tea garden labour lines, bus stops, playgrounds aser schools o colleges anasa Aspirational Boxes 4000 tema yutsütsü. Idakji nübor temi manifesto atema tebilembatem enoka yutsütsü akok.

Assam nung flood mitigation mapa meinyakba, süngolu ayimertem indang taa ajema agütsüba, kin 6 nem ST jenjang magütsüba, tanur abenba tetsür aika asüba, tanur shibelenba, rural healthcare tashimait akümba, school züngtor anenba aser man-animal conflict kanga atalokba mapang ka nung APCC-i iba campaign tenzükur.



December 07, 2025 nü North Goa district nung takoksa angur kinüngertemi Goa Medical College & Hospital kima tasü mang atadang tangokba noksa nung angur. Honibar ayaterm nung nightclub ka nung mi lendong ataloka nisung 25 asü aser nisung trok yiru.

Goa nung nightclub ka nung mi lendong nung nisung 25 asü

New Delhi, Luchii/ December 07 (Agencies): North Goa district nung aliba nightclub ka nung fireworks amshiba nungi mi tulu adoka nisung 25 asüba tatalokba bushisüngdangtsü atema Goa chief minister, Pramod Sawant-i tetuyuba agütsüogo. Mezüngbo iba lendong ya nightclub nung gas cylinder apokba ajanga atalok, ta osang proka liasü, ajisüaka Amongnü Goa chief minister-i, Arpora nung aliba night club nung electrical fireworks amshiba ajanga iba lendong atalok ta mezüng bushisüngdang ajanga jangjaogo, ta metetdaksü. Amongnü Panaji nung osangbenertem den jembidang

Sawant-i, "Mezüng nibo bilemer," ta metetdaksü. Arpora nung aliba 'Birch by Romeo Lane' nightclub nungji ayaterm nung mi tulu adokba lendong nung nisung 25 asü aser nisung trok yiruogo. Iba nightclub ji Arpora ayong anasa lir aser club telungi aiba aser adokba kishiji kanga temesü. Iba dak alia club leni aoba lenmangji kanga temesü asüba ajanga Fire brigades lendong atalokba tesemji tonga moutet. Asürtem rongnung raliwalir pezü aser staff züngsem 14 densema liasü. Tang tashi nisung tenet maitsübo mejangjar. Police-i club kiburtem anema FIR ka benokogo.

Bihar nung Fast-Track courts 100 amenoktsü: Samrat Choudhary

New Delhi, December 07 (Agencies): Amongnü Bihar nung Home Minister Samrat Choudhary-i, ozüng alema inyakba ken o million 1.8 bentettsü atema state sorkari districts 38 aser sub-divisions nung fast-track courts 100 amenoktsü, ta metetdaksü. Bihar nung nisung tepsetba, auyaba aser Arms Act alema inyakba densema ozüng alema inyakba ken o million 1.8 dak tali anendaka lir. Fast-track courts 100 ji state tesem balala nung

amenoktsü; state yimtiba Patna nung 8 amenoktsü, Gaya, Muzaffarpur, Darbhanga aser Bhagalpur shia nung pezüzü amenoktsü, Nalanda, Rohtas, Saran, Begusarai, Vaishali, East Champaran, Samastipur aser Madhubani shia nung asemsem amenoktsü aser Naugachia o Bagaha sub-division na nung kaka amenoktsü, ta minister-i metetdaksü. Item courts atema sorkari bench clerks, stenographers aser data entry operators




December 07, 2025 nü New Delhi nung aliba school tem nung 'Delhi AI Grind' tenzüksüba sentong nung Delhi Chief Minister Rekha Gupta, Education Minister Ashish Sood aser astronaut Shubhanshu Shukla nung adenba noksa nung angur.

Parliamentary Panel-i IndiGo aser Civil Aviation Ministry jaoktsü

New Delhi, December 07 (Agencies): Tesüiba anogo IndiGo tayimtsü service aika thinenba ajanga passenger meyrjang aikati timtem ajangshia arudar; iba dak sendakba nung parliamentary panel kati IndiGo nungi tongti executives aser civil aviation regulator jaoktsü. Transport, Tourism & Culture indang Parliamentary Standing Committee-i IndiGo nung tongti executives, Directorate General of Civil Aviation (DGCA) aser Ministry of Civil Aviation nung tongti ketdangsertem jaoka asüngdangyatsü. Parliamentary Panel nung tongtiji JD(U) lenir Sanjay Jha lir. Parliamentary Panel nung züngsem kati, tayimtsü service aika anenba ajanga passenger meyrjang aikati timtem ajangshibaji Panel-i jungjunga shisadangogo, ta metetdaksü. Tayimtsü service thinenba ajanga nüburtem dang masü saka asükwa mongpu Parliament senden atema linük yimtiba, Delhi-i arua alir yimtenren lenirtema aikati timtem ajangshiogo, ta Panel nung züngsem kati metetdaksü.

Nüburtem aikati, IndiGo tayimtsü service thinenba ajanga tanga tayimtsü ticket nung sen kanga tali atuba MP tem den lemsatepogo. Rajya Sabha nung CPI (M) nungi MP, John Brittas-ia IndiGo tayimtsü aika thinenba bushisüngdangtsü atema joint parliamentary committee ka tentettsüla, mesüra iba ya bushisüngdangtsü atema court nem agütsütsüla, ta takhangba agütsü. Amongnü Delhi aser Mumbai na kija nunga IndiGo-i tayimtsü 220 dak tali thinenja liasü. Honibarnü Civil aviation regulator, DGCA-ia IndiGo CEO, Pieter Elbers aser Accountable Manager Porqueras dang tayimtsü service thinenba atema kuli agüjang, ta metetdakja liasü. Amongnü IndiGo-i, IndiGo indang parent company Board of Interglobe Aviation-i iba tensa asadangtsü atema Crisis Management Group ka tentetogo, ta metetdaksü. Parnokisa, passenger temi ajangshiba timtem punbatsütsü aser passenger tem nem ticket sen meyipa agütsütsü atema company indang Board of Directors-i inyakdar, ta metetdaksü.

NDA-i West Bengal aser Tamil Nadu nung takok angutsü: Amit Shah



Ahmedabad, December 07 (Agencies): Amongnü Union Home Minister Amit Shah-i, West Bengal aser Tamil Nadu na nung taruba election snung NDA teloktepi takok angutsü; linük tesem ajaklen Congress aser opposition teloktep sendokertemi yariba ajanga NDA-i item elections nung takok tulu angutsü, ta metetdaksü. Paiza, 2029 World Police & Fire Games aser 2030 Commonwealth Games ayongzüka agiba sülen Ahmedabad nungsa 2036 Olympics ayongzüka akatsü, ta metetdaksü. Terenlok project aika tenzüksüba sülen Ahmedabad Municipal Corporation indang sentong ka nung jembidang Shah-i, tawa Bihar assembly election nung two-third majority ajanga takok ngua BJP aser NDA teloktepi maneni takok ngua arudar, aser sangküm West Bengal aser Tamil Nadu assembly elections nunga takok

angutsü, ta ashi. "2014 küm Lok Sabha election nungi tenzüka 2025 küm tashi BJP-i maneni takok ngua arudar. 2024 Lok Sabha elections sülen asen lenir Narendra Bhai tasembenbuba Ato kilonser aküm," ta Shah-i metetdaksü. Paiza, Maharashtra, Haryana aser Delhi nung Congress sorkar atsüngdokba sülen tatemsa Bihar nunga Congress atsüngdokogo, ta ashi. Lok Sabha nung Opposition lenir, Rahul Gandhi aija Shah-i, "BJP aser NDA teloktepi two-thirds majority ajanga Bihar nung takok ngua sorkar kümogo, ajisüaka Rahul Gandhi-i maneni EVMs aser voter list nem tai tongloktür. Ajisüaka atangji nungbo linük nung nüburtemi Congress aser par teloktep magizüker," ta ashi. "Tanü ni iba sabang nungi ya metetdaksür, ni Mamata Banerjee aser Stalin (Bengal aser Tamil Nadu na nung chief minister tem) na dang renema alitsü metetdaksür. Bihar sülen NDA-i West Bengal aser Tamil Nadu nunga takok angutsü," ta pai metetdaksü. India nung nüburtemi lenla ajak nung terenlok alitsü aser Ato kilonser Modi lenisüba kübok India ya temaba linük ka kumdaktsütsü telemtetba agiogo, ta paiza shisem.



TIR YIMYIM YIMOBILEM (EDITRIAL)

DIMAPUR MONDAY, DECEMBER (LUCHII) 08, 2025

Hornbill adena angutsüla !

Nagaland nung züsentetba, inyaktetba aser sobaliba rongsen aika lir, saka itemji tangbo Hornbill mapang nung dang sayur aser ayoker, saka itemji Hornbill benjong asoshi dangbo masütsüla ta Delhi nungi aruba Union minister Wb.Jyotiraditya Scindia-i asenok dang shir aoba o ji asenok asoshi tagitsü o ka lir. Ibaji state government nung, talisa, Tourism department nung ketdangsertemi bilemdangtsüla aser mapa kuma inyaksüsa sentong yanglutettsüla. Atangji, tang tangbo Nagaland nung akaba ajunga hornbill benjong mapang anogo ter nü tsüngda sayutema sayutsü meranger amato sentong tapu balala yanglua amonger, anungji iba mapang ya dang bendang semer nungi raliwalirtem arua Kisama nung monger oa adoker. Ajisüaka, Nagaland nung alir Naga kintem meyong sobaliba aser inyaksangshi mapatemji Kisama nung Hornbill benjong mapang sayubaji dangbo masü, saka Naga nung sobaliba aser inyaksangshi maparen tajung aika yimtsüngtem nung lir. Itemjia alima dang sayutsü nüngdaker. Aji oda, Nagaland-jia Kisama dangbo masü aser Nagaland nung raliwalirtem arua amongtsübjaja Hornbill benjong mapang ya dangbo masü, anungji Nagaland ajunga ya Nagaland Tourism map nung enoktsüla aser kum piyong alima tesem balala nungi raliwalirtem arua amongtsüsa tereprangnüttsüka aser talinüttsüka Nagaland Tourism website nung sayutsüla. Aji oda, tanü asüngbo benjong ya rongsen, nübo aser mapang endoka pelatepa amongba sentong ka dangbo masü saka benjong ajak senotsü aaba mapa 'business' kumadokogo. Aji oda, asenok Christmas amongba kisung nunga, chiyongtsü ayokertem maden, decoration osettem ayokertema sen kwika tajangzük ngua alitsü ta bilemer ? Iba ama tagitsü mapa aser temoatsüji asenok shisa tenük agia reprangtettsüla aser Nagaland ajaklen kum piyong raliwalirtem telok telok arua amongtsüsa asenoki sobaliba sentongtem atongtettsüla aser aluyimba aser teka mapa nung temulung agütsütsüla. Asenok aika dak tang tashi mapa meiyak ser sen agizüka aginüba shisatsü dena lir, iba jagi Hornbill benjong ama nung ya aikati tangari yanglua akaba alizüka bener arua ayoker, anungji item mapatemjibo hornbill benjong atem den külemi atemer. Aji oda, tatishitsü agi asen lima nung Tripura aser Assam nung yangluba osettem bener arua Nagaland nung Naga nungertemi yanglutetba ama sayua ayok nung, asenok kechi tajangzük ali ? Joko, tanü putu yabo tiyazü nung alitsü merangba putu masü, saka mapa shitak shitak inyaka taküm tajungba tajungba alitsü merangba putu lir. Aji oda, tanübo asenok mapa ajak nung nisungi dang masü saka computer ajanga Artificial Intelligence teyari agia inyakba putu lir, anungji asenoka mapa meinyak ser sen agizüka agiba tejen sobaliba tamajung nung to melii, joko asenoka asen lima nung aseni inyakba ajanga tangar dena puatsüsa inyaksübjaji tang mapangba ya lir. Aji oda, asen sobaliba rongsen aser inyaksangshi sobaliba sayutsübjaji benjong nung dang sayutsü aser inyaksü ta masü, saka itemji asenoki anogo shi inyakba mapa asütsü tim. Joko, asenokia molutzü alema oa alimatem angur aser tangartema asenok dangi arur, anungji asenok asoshia alima ya yimtsüng ka dang ama kumadokogo. Aji oda, tangbo asenok ainlen ayipba aser chiyongba sen tanendak agütsüba ama, asenok dangi arur raliwalirtem asen kidang asenok den külemi anena, parnok ayipba aser chiyongba sen-a parnok dang meshitsü. Kasaji, asenok bendanglen tesem balala repranga anir jajartemi 'hire' sen agiba ama, asen lima nunga asen nisungi bendanger raliwalirtem yimtak süshia mesüra arem, tenem aser ayonglen süshia , parnok raliwalirtem anir jajaba senji meshitsü. Item jagi asen lima nung lanurtem aika mapa angutsü aser asen sobaliba tajung ya angati talubosa anguba sobaliba ka masü saka sen jenjang tulu aketba sobaliba kumadoktsü. Atangji, aji dang masü saka tanga len nungi asen limai arurtem o asenok naji, shitakba nung, talir o tayoker na ajurutep amai asütsüsa sentong yanglutettsüla.

OLEMSABANG

KIYIMDANG SEPOKBA HON KERI AYOK

~ Wb. Temjentenzük

(Iba Yimdangjem otsü ya Tir Yimyim aser Bookipedia nati ayongba toktep nung Tasembuba takok jenjang anguba liasü.)

(Yashi adok nungi...)

Aji oda par kibong nung timtem khuret jenti ajuruaka, kodakernakasür item khuretem ajak koktettsüsa Tsüngrem temeimi par kibong aniteta aru. Tena kibong kümer kum metsürti nung jajayonga arudang, par jabaso rijumen terpezü ajanger, SBI nung mapa Tsüngremi moatsü. Asanguba mapa angubaji par kibong atema Tsüngremi temoatsü kichiba tuluba telapoktsürba liasü. Jabaso mapa anguba jagi tenati joko tena ita sen nungi ita shia Indian post office nung hon keritaseen atsüngtsüba nüngtem nung sen terara bendentsü tenzüktet. Ano külen tena jala shiba temaba riju nung science zünger, MBBS seat atema NEET tatidang agütsütsüba liasü, la atema tedii kanga temulung agüja yaria aru. Aser tenatia par jala atema lumia sarasadema Tsüngrem dang la nem takokba agüjang ta mepishia liasü. Tatsüka lir result adokdang takoker rongnung la dena liasü. Jala MBBS azüngtsü atema tedii senotsü ajak anepalur admission agidaktsü. Tsüngremi pa mapang tetemsü nung pa dak amanga alirtem atema kechisarina tajung ajak atalokdaktsür ta ashiba ama, joko par kibonga Tsüngrem taochi nung anisüngzük tulu ngua kum ka nungi kum ka ta jenjang tajungba nung lia ao.

Aji oda Sentijen aser Narola tena kibong kümer kum semerasem buba nung jajadang, tenati Indian post office nung bendenba sen agizüktsüba mapang atong. Iba sen agizüker tena tanaben meyipa sonari dangi oa kiyimba hon keritaseen la atema honzük atsüng. Tanabenbuba atsüngbajibo kanga agi tuluba aser la honzük nunga temeim noksa ka hon temeja agi enoksema atsüng. Iba hon keritaseen meyipa anguba anogo ya tena atema Tsüngrem nem tenüngsang tulu agütsüba mapang ka liasü; masadangtet Tsüngrem temeim bilemteta tepela nüktzü ayimba anogo ka liasü. Joko tanaben tena kiyimba hon keritaseen ayoktsüsa par kibong dangi tia tamajung tarudaktsü ta tenati teti sarasadema liasü. Iba anogo ya tena atema tepelatiba anogo ka aser nüktzü timtiba ayimba anogo ka liasü. Tenati tekülem kidangi oa apudaker Tsüngrem nem tenüngsang agütsü.

Tang joko tena arishi kum tenemertuko nung jajadang, Tsüngremi arishia yutsüra Sentijen mapa nungi anisüngzük angutsüba kum ka sür ita ishika dang lir. Par jabaso mapa anguba agi temulung lemtetdak ka ngua, pai kum ishika tejaklen service loan agir Dimapur nung ali tilaka alia akaba nungji, Tsüngremi arishia anema tokja pension ngutetra, pension sen jagi ki tila ka sür, tenaprongla soa intet dak Dimapur yimti nungji alitsü tenati menungraset penzüa ataba mapang ka lir. Tena teyongyaba aika dang lir. Mapa nungi anisüngzük ngur teinyaknuba aika lir. Aika rongnung tenati inyaknuba kaji akokba lenrü ajak nung timtemertem yaritsübjaji lir. Par kibong timtema aruba ama timtemertem aika dang alitsü, item nüburtemji yaritettsüsa Tsüngremi lenmang lapokjang ta tena sarasadem lir. Ano külen par jabaso aser jala kibakiyi asütsüba lenmang lapokjang, aser tena nema item anogtemji ngudakjang ta, Tsüngrem dang arishi anogo meshia metitemi sarasadem nung tenati abener. Yamaji Tsüngremi moatsütsü ta amanga, tenati tenüki mongui aliba tarutsü semchirtem atema sarasademja anogotem süidaktsür. Tenati mamadoktetba aser temulung shiranga mapang shia bilemtetba kaji, par jalai kanga meimba par azü yoktoktsüsa akümba tatalokbaji lir. Kodangsa tenati iba tatalokba bilemteta jembidir nüktzü aluba memeteti tenapronglai tang tashi kanga sasar!

Sentijen aser Narola tena teyongyabaji künü anogo kodang pei pei mapang nung tipu limai tasendir, Tsüngremi "lanlia kilir tajung na teti tepeladaki iang" ta shia agizüktsüsa tenati alitsü meranger. Aser oagi mesüliyim nunga anosa tena külemi alitsübjaji koda jangratemsü asütsü ta nüklai arua ataba mapang lir. Aji oda Tsüngremer taochi nung topur junga aser meraketa, tasatao tashi iba lima nung pela alitsü nükla yur, akokba tashi tenati merükmeja chiyungtsütem chia temang anema alitsü meranger. Aser arishi tatem nung kodang Tsüngremi jadiri, "Kibur ni yangi lir" ta langzüa Pa den ajuruteptsü tena teimla lir.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan kübok Gujranwala nung pastor Kamran Salamat khaset



December 07, 2025: Ita ana tejaklen Pakistan yimtiba, Islamabad nung tasü lendong nungi jenbur pastor ka December 5 anepdang Gujranwala yimti nung khasetogo.

Pastor Kamran Salamat Michael-i par kibong kümzüka alitsü atema kibong rangben Gujranwala yimtii arua jenoka liasü. Nisung kari pa dak injang khaloktsüba sülen hospital-i anir oa doctor temi akokba tashi pa kümzüktsü merang saka mekümzüktet.

British Asian Christian Association (BACA)-i mangyimer kibong semdangba den külemi senotsü teyari agütsüogo. BACA team kati Pakistan semdanga pastor asüpila sentong nung indokba senotsü-a ajak agütsü. British Asian Christian Association ya UK nung amenoka aliba melungtet telok ka lir. Parnoki Pakistan nung reshikangshi ajangshiba Khristantem yarir aser refugees-a nungita yarir.

December 5 anepdang Gujranwala kübok Islam Colony nung mejangjaba nisung kati Pastor Kamran Salamat (45) dak injang khaloktsüba sülen pa Civil Hospital Gujranwala-i anir ao saka doctor temi pa mekümzüktet.

Pai pa kinüngtsü den tanur asem toktsür pilaogo.

Pastor Kamran'er kinünger Pastor Shahzad Salman-i, December 5 anepdang 9:00 ako meta Pastor Kamran-i par jala Numeer college tonga anir otsütsü atema kimai ayazüka aluba mapang nung mejangjaba nisung ka motorcycle nung aruba sülen pastor dak injang aiben khaloktsü. Ajioda injang jagi pastor tekanük, tenarong aser teboklang yiruja liasü.

Idangyongjisa pastor Kamran'er jala Numeer-i süng agi nisungba dakji zükokja liasü.

1122 Rescue Team-i pastor Civil Hospital-i anir aoba sülen doctor temi akokba tashi pa kümzüktsü atema yari, ajisüaka tia makai anüngdang 12:00 ako nung pa süadok.

Police-i CCTV noksa repranga bushisüngdang tenzükogo. Pastor dak injang khaloktsüsang dak bangsemo talang liasü. Pakistan Penal Code kübok Arrla 324 nung ajemdaker mejangjaba nisungbaji anema First Information Report ka benokogo.

British Asian Christian Association den jembidang

Pastor Shahzad-i, Pastor Kamran ya Islamabad nung aliba Pentecostal Arogo ka nung pastor inyaka liasü aser Pastor's Alliance Islamabad nunga Chairman teinyakdak liasü, ta metetdaktsü.

Pastors' Alliance nungji züngsem pastor 200 shi lir.

Pastor Kamran ya Pakistan yimtiba, Islamabad nung meimchir temeden, talisa Khristantem temeden atema ola adoker ka liasü.

Ita ana tejaklen-a Islamabad nung yimsü alia amanger kati pa dak injang khalokja liasü, saka iba lendong nungji pa tetsüng dang yirua tasü nungibo jenbua liasü. Iba tatalokba sülen pa Holy Family Hospital, Rawalpindi nung treatment agi.

Pa taneptsü anguba sülen Pastor Shahzad-i ajungshiba ama par kibong kümzüka alitsü atema Islamabad toktsür Gujranwala-i oa liasü.

Pastor Kamran'er kibong Gujranwala-i oaka pai Honibar aser Amongnü shia Islamabad-i oa Church of Pentecostal nung tekülem sentong agia liasü.

Pastor Shehzad Suleman-i, "Pa kanga tasütait liasü aser Tsüngrem tenzüktsü atema pai kecha metsübu. Tanübo pai pa taküm bendanga agütsüogo," ta metetdaktsü.

Pastor Shahzad-isa BACA-i Kamran'er kibong nem teyari agütsüba atema pelaba lemsatep. Pastor Kamran-i pa kinüngtsü Salmina Kamran den jala ana- Numeer (16) aser Arina (11) na aser jabaso Ariel

(14) nunger toktsür pilaogo. December 5 anüngdang pastor asüba sülen anogo ka lir December 6 nü Saint Paul Presbyterian Church, Gujranwala nung asüpila sentong agi. Asüpila sentong nungji lokti tulu adenshia asür nem akhüm agüja liasü. Iba dak alia asüpila sentong nung indokba senotsü ajakji British Asian Christian Association-i agütsü.

Pastor Kamran-i toktsüba kibong züngsemtemi kechi tia ajurutsüar memetet, ta shia British Asian Christian Association (BACA)-i ajak dang tang ama mapang nung par kibong nem senotsü teyari agjang, ta ayongzük.

"Nenoki senotsü teyari agütsüba ajanga parnok mangyimba mapang nung anisüngzük angutsü, shisaliok aser anogo shia nüngdak balala peritsü," ta BACA-i metetdaktsü.

BACA-isa Pastor Kamran tepsetba ken o ya jungjunga bushisüngdangba maparen nung senotsü agi yaritsü, ajisüaka ketdangsertemi aibelener anema inyaktsü memelunger amai onoki reprangteter, ta BACA Trustee züngsem Juliet Chowdhry-i metetdaktsü.

Juliet Chowdhry-isa, "Pastor Kamran tepsetba ya Pakistan nung Khristantem anema asalentong yanglu inyakba shilem ka lir. Taoba mapang Federal Minister Shahbaz Bhatti-i minorities temeden atema inyakba atema pa tepsetba-a onoki bilemteter. Tsüngrem mezügmeshiba ken o nung tai tonglokja alir adianu anati takok anguba sülen court kima tena dak injang khaloktsüba densema Khristantem anema inyakba tatalokba aika lir. Ochi temeden atema onoki inyaktsü aser pastor Kamran'er kibong ama kibongtem aika nungita yaritsüla," ta metetdaktsü.

UP nung court-i Dalit Khristantem nem teyari magütsütsü tuyur



December 07, 2025: Uttar Pradesh nung High Court-i sorkar ketdangsertem dang Dalit Khristantem nem Scheduled Castes nisungtem nem agütsüba sorkar teyari agüja aliba ajak anenang, ta tetuyuba agütsüogo.

Khristan yimsü dangi meyipba Dalit nungertem nem maneni sorkari teyari balala agütsübaji linük temzüng kübok ashikülak lir, ta court-i metetdaktsü.

November ita nung Allahabad High Court-i iba

tetuyuba agüja liasü aser December 2 nü yimjak nung sangdongogo. Court-i district magistrates dang, Khristan yimsü agizüker Dalit nungertem nem sorkar teyari balala agütsütsü temsüa mali, ta metetdaktsü.

India temzüng kübok Scheduled Caste nisungtem nem shisaliok rejutem, sorkar mapa aser yimtenren nung menden shiteta agütsür. Item maongka ya Hindu, Sikhs aser Buddhist nunger nem dang agütsür.

ANOGO ABEN TSÜNGREM DEN

Temeshi Rasaba T.Ken 58:1-11

Tanü Tsüngremer nüburtemi temeshi rasaba sayutsü nüngdaker. Sensakertem ajemrepba aser politician-temi ozüng raksaba asenoki kodanga pelaseta magizüker. Tsüngremi temaba menden nung amenertemi parnok asoshi dang tashi amshibaji maginer. Shidakba yimsüsürtemi parnok tashiji nübur aser par linük yanglutsü amshir. Dawidi iba ken pa temeshi tejashiba agi zülu. Pa jashia mali asü saka temulung ayanga iba ken zülu.

Dawidi yimsüsür temenen anema jembi (t. 1-5). Parnok o temeshi masü, aser parnoki ochi o bendang magütsü (Yob 31:6). Parnok tekai seret shidak mamshir, kechiaser parnok temulungjang tamajung liasü. Dawid parnok per ka den atishia jembi (t. 4). Dawidi tanishirtemi o bendang (t. 6-9). Tanishirtem asoshi obendangba arutsü noksa terok agütsü: 1) tebu maket molusongzü (t.6) Kenü Tsüngremi tebu atsüdoktsütsü aser parnok Tekümpzüker malitsü; (2) ali nung tzü remadokba (t.7)-tsükla sülen, tsünglu malur aser ali telungi luadoker; (3) teraksa lijakjang (t.7)Tsüngremi parnok akhümdong ajak agentsü; (4) yimsaa aoba küpra (t.8) tamajunger parnok sasa tali aodang yimsaadoktsü; (5) tasü asoba nu (t.8) parnoki timtem aika ajurutsü aser asütsü; aser (6) chipo mopungi oner aoba (t.9) parnok sentong tatem matemtsü, aser parnoki Tsüngrem terasabai raksatsütsü.

Dawidi pai Tsüngrem tushiba metetdaktsü (t. 10,11). Asenoki asen sasa mang mayanger, saka tamajunger Tsüngremi ochi o bendang nung pelar (J.Adok 18,19). Pai pa tsükchirtem madak noktaksü. Kenü temeshipuri Tsüngremi takok anguba nung pelateptsü. Alima o bendangtsü pai aremzüka atar. Kodang ibaji atalokdir Tsüngremi tim bendangtsü, aser Yisu sentsüwangshitsü.

Tashi mejungi amshibaji tejen tebilemtsü lir. Shirnoki pei tashi mejungi amshir parnok dangi kechi arutsü Laishibai ashir. Tsüngremer nüburtemi parnok temeshi terasaba sadoka ashitsü, kechiaser kenü tamajunger o bendangtsü ta asenoki metet. Pa takokba nung aser temeten nung aruba asoshi Pa tenüng tushiang.

AO OSHI ANGAZÜKDAK:**TANÜ ANGAZÜKTSÜBA OJANG****Tsüksüngonsüung**

(adv) alu nung tsük aika aruba, temoatsü arenba mapang (bountiful harvest, blessed time)

* Ibai asenok asoshi tsüksüngonsüung mapang lir.

Tsükten

(n) mimung tema osettsüset ayuba satem (shelves over fire place)

* Tsükten nung asenoi shi tendaka ayur.



Tir Yimym

OLONG PAITEP # 7353

1		2			3		4		5
				6		7			
8									
						9			
			10						
11									12
					13			14	
15									
16							17		

TIPIEN

1. Nüji masü - (4)
3. Technütsüka - (6)
7. Aketa shirangba - (5)
8. Pi - (6)
9. Amena - (5)
10. Kinü - (5)
11. Tanang masü - (5)
13. Lenmang - (6)
15. Nübo tedi - (5)
16. Tuoshi - (6)
17. Shiruru apuba temenatsü - (4)

LANGTSÜNGLEN

1. Jila tulu - (5)
2. Sarasademdang tembang - (4)
4. Tarutsü indang ashitem - (6)
5. Alia - (5)
6. Mojing - (5)
9. Tai inyakba metet - (5)
10. Medemer chijiba - (6)
11. Tatokba / Amadok - (5)
12. Anüngdang masü - (5)
14. Jabaso masü - (4)

OLONG PAITEP # 7352 TELANGZÜBA**TIPIEN :**

1. Tesangra, 5. Mungo, 7. Kisen,
8. Salem, 12. Semki, 14. Kilem,
15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon,
4. Aso, 6. Nile, 9. Alizüing,
10. Omen, 11. Lemta, 13. Ola,
14. Kin.

NAI-A YA METETTER

Maharashtra sorkari Guinness World Record ka ngutetogo aser iba ya ita ka nung solar agriculture pumps 45,911 amenokba atema lir. Maharashtra state power utility MSEDCL ajanga 'Magel Tyala Saur Krushipump' scheme inyakdang iba otsü yanglutet aser Guinness World Records-i agizükogo. Iba atema December 5, 2025 nü Shendra MIDC nung Chief Minister Devendra Fadnavis lia certificate presentation ceremony ka agiogo.

Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimym@gmail.com nung yokang mesüra Tir Yimym bureau tem nung agüjang.



MeoGong Festival 2025 tenzüker anogo ana tashi nung nisung 55,000 tema denogo aser iab ajanga national aser international concert circuit nung Meghalaya jenjang temabai atuba sayur. MeoGong Festival ya Northeast India nung sobaliba sentong tongtipang rongnung ka ta züngshir aser mezüing anogo nung Richard Marx, Neeti Mohan, Julian Marley aser Nucleya nungeri shilem agia liasü. Deobarnü British pop group Blue, electronic duo Yellow Claw, singer-songwriter Prateek Kuhad aser Bollywood performer Kanika Kapoor nungeri shilem tajung agiogo. (Shillong, December 7)

2026 elections matongdang BPF-i BJP den tesentaktep mayutsü

Guwahati, December 7, 2025

(Agencies): 2026 Assam Assembly elections matongdang Bodoland People's Front (BPF)-i Bharatiya Janata Party (BJP) den tesentaktep mayutsü ta metetdaksüogo.

Iba osang ya BTC Deputy Chief aser senior BPF leader Rihan Daimary-i Gohpur nung ashi.

"BPF-i taruba assembly election nung kija dang tokteptsü. Election matongdang political

party shinga dena tesentaktep mayutsü aser election agiba sülen ang menden teimba anguba party den tesentaktep ayutsü akok" ta Daimary-i ashi.

Assam nung kin trok nem Scheduled Tribe (ST) jenjang agütsütsü atema o atsüteper. Ajisiüaka, BPF-ibo tang aliba lisopur dak mekongshira parnok aniokbaji kecha masü ta bilemer ta paisa ashi.

Tawa BTC Secretariat amakba atema Daimary-i "All

Bodo Students' Union (ABSU) aser United People's Party Liberal (UPPL) den sendaktepa alirtemi iba mapa inyak. Anungji Assam sorkari iba mapa inyakertem dak ozüing tapet agi merenshitsü mepishir" ta metetdaksü.

Iba sentong nung Dhanashiri constituency Executive Member Fais Muchahari aser Chairman Tridip Daimary nati anir BPF party lennir aser züngsem aika aden.

Myanmar nungi bener aruba kozüjang seret 10,920 apu

Imphal, December 7, 2025

(Agencies): Assam Rifles aser Manipur Forest külem telok kati Senapati district nung Myanmar nungi bener aruba kozüjang aika puogo.

Parnoki kozüjang seret 10,920 apu aser iba indang jenjang ya Rs 12 lakh shi lir.

Kozüjang ya Myanmar nungi Manipur-i mima bener aru aser Nagaland den arrtsüa

aliba Senapati leni gari ana nung bener liasü ta ketdangsürtemi ashi.

National Highway 102 nung ozüing alema kozüjang shibelenba osang tejangja angazükba sülen Assam Rifles aser Manipur Forest ketdangsürtemi mita ao.

Parnoki temulung melemi bilemba tesem ana nung mita ata aser idangji Tata 4x4

trucks gari ana nung kozüjang seret 10,920 bena aliba apu aser iba dak sendakba nung nisung pua lir.

Parnoki apuba kozüjang ajakji Mao Range kübok Maram Beat Office ket nung agütsüogo aser ketdangsürtemi forest laws nung ajemdaker Preliminary Offence Reports (PORs) ana benokogo.

Karbi Anglong aser Cachar nung Rs 11 crore alang drugs apu

Guwahati, December 7, 2025

(Agencies): Assam Police-i Karbi Anglong aser Cachar district tem nung mita aodang Rs 11 crore alang drugs puogo ta Chief Minister Himanta Biswa Sarma-i ashi.

"Assam nung drugs aika puogo. Karbi Anglong nungi Silchar tashi drug shibelenertem timtemer kechiyong Assam Police-i mapa tajung inyaker" ta Sarma-i metetdaksü.

Assam Police-i state nung drug shibelenba azüoktsü kanga meranga inyaka arur aser parnoki Karbi Anglong o Cachar nung tesem kar mita aodang drug shibelener aika puogo.

Tirap district nung NSCN (K, Niki-Sumi) züngsem ka apu

Itanagar, December 7, 2025

(Agencies): Arunachal Pradesh kübok Tirap district nung sepaitemi National Socialist Council of Nagaland (NSCN-K, Niki Sumi) züngsem ka apu.

Osang tejangja ka angazükba sülen Assam Rifles

asir Arunachal Pradesh Police külem telok kati Hukanjuri tesem mita aodang Jenlong Supong ta ser NSCN-K captain ka apu.

Parnoki pa ket nungi pistol ka, magazine ka, live rounds, mobile phone aser PAN card ka ngutetogo. Pa ya Khonsa

Police Station ket nung agütsüogo.

Iba mapa ajanga central aser state agencies tsüngda Arunachal Pradesh nung yimjung aser tensa süngjema ayutsü asoshi inyakba kuli agütsür ta security ketdangsürtemi ashi.

Russia aser
Ukraine maneni
kati ka maktepdar

Moscow, Luchii/December 7 (Agencies): Manger mesangwa tsünga Russia air defence-i Ukraine-i yokba drone 77 khazüka yokogo, ta Russia indang defence ministry-i Deobarnü metetdaksü. Küm pezü jungnüa raraba mapang linük anapronglai arrtsü adena kati ka maktepdar.

Ukraine-i yokba drone tem ya Russia teyong aser south len aser Russia-i atsünger aliba Crimea kübok tesem tenet tashi nung khadanga liasü, ta ministry-i Telegram messaging app ajanga metetdaksü.

Moscow nungi km 1,000 shi pilar Ukraine den arrtsü nung aliba Rostov tesem nung power transmission tower ka raksatsüogo aser iba ajanga kibong 250 power makai aküm, ta Rostov Governor Yuri Slyusar-i Telegram ajanga metetdaksüba den lendong nung shinga miyiru ta shisem.

Saratov tesem nung drone 42 raksatsüogo aser Rostov tesem nunga drone 12 raksatsüogo, ta defence ministry-i ashi.

Russia nunger ketdangsürtemi, Ukraine-i anüng ajanga tesem balala amakba mapang teraksatsüba adokdaksüba indang aibenbo memetetdaksür aser military infrastructure tem amakba indangbo memetetdaksüba den kasa dang.

Kyiv-i drone amshia oil depots, airfield aser Russia nung tanga tongtibang tesemtem taliba maka arudar.

Kasa mapang nung Russia nunger sepaitemi Ukraine kübok Kremenchuk yimti nung infrastructure balala anüng ajanga makogo aser iba ajanga power supply nung tetsükdaksü adoka liasü, ta mayor Vitalii Maletskyi-i Deobarnü metetdaksü.

Kremenchuk ya industrial hub tongtibang ka lir aser iba yimti nung Ukraine indang oil refineries tulutiba rongnung ka amenoka lir. Iba yimti ya Russia-i missile amshia aiben maka arudar, kong 2022 küm shopping mall ka maka nisung 21 tepsetba densema lir.

Maletskyi-i social media post ka ajanga ashiba agi, yimti nung ketdangsürtemi electricity, tzi aser heating yanglushitsü atema inyakdar, kong supply tem nung tetsüdaksü adoker lir.

Russia-i, asükwa maru tsünga missile aser drone amshia Ukraine indang power, heating aser tzi infrastructure tem tali maka arudar.

Mayor-i lemsatepba noksa ka ajanga aonung industrial building ka mi agi arongba nguogo.

Molungnen O



TASOBA :
08-06-1975

TASÜBA :
03-12-2025

Asür Takamanen, shirang yipten nung aliba mapang nungi pa arishi tempangba tashi shirnokisa nübu, rongsen aser sarasadem agi ozü den yaritepogo nenok ajak dang kanga pelar. Aser tongtipangsa -

1. Eden Hospital Doctor aser Nurse tem
2. Dimapur Ao Baptist Arogo
3. Anaki Phom Union, Dimapur aser sensosangertem
4. Yaongyimsen Union Dimapur, Fellowship aser sensosangertem
5. Kevijau Colony Council-i anir Kiyongertem.

Ana aser talang nungi shirnokisa ozü asüko lemsatepogo Tsungremi nenok ajak moajangma.

Temeim jalatem aser kinungertem

Sudan ayawara agi meneptsü ana nung lir: WFP

Khartoum, Luchii/December 7 (Agencies): Sudan nung Sudanese Armed Forces (SAF) aser Rapid Support Forces na maneni raratepba mapang humanitarian aid crisis tulu ka ajangshitsü ana nung lir,

kechiyong ayatzür agi meneper aliba nisung million aika nem chiyongtsü magütsüteti arudar, ta World Food Programme (WFP)-i tekümdangtsü metetdaksüogo.

WFP Deputy Executive Director Carl Skau-i Deobarnü Al Jazeera dang ashiba agi, par lokti tenteti linük nung nisung million 5 nem teyari agütsüdar, kong tonga aotsü asoshi kanga dang saka aliba tesem nung alir nisung million 2 densema lir, saka aji teperi masü.

"Tenügdakba ulura. Nisung million 20 shi chiyongtsü agi anüngba aser nisung million 6 shi yatzür agi meneper aliba indang jembirba," ta pai ashi.

"Iba ya timtem lendong tulu ka aser onoki kechi inyakteter aji kanga dang tongtibang saka teperi masü," ta paisa shisem.

Pai ashiba agi, WFP-i nüngdaka alirtem nem teyari agütsütsü atema takok tashi inyakdangogo, kong tayimtsü ajanga chiyongtsü tsükdaksüba, sen digitally yokba aser sabanger aliba tesemtem kima convoy tem anenden ayuba densema lir.

Ajisüaka iba amala inyakyim ya North Darfur state yimtiba el-Fasher amala tesemtem nung benoka minyaktet, koba paramilitary Rapid Support Forces (RSF)-i ita 18 tashi sabanga ayuba sülen October ita atsüngogo.

Skau-i ashiba agi, alimai Kordofan tesem dak rangloksüla, kong hopta ishika SAF aser RSF na kanga sashia raradar.

UN human rights tekolakba

Volker Turk-i Brehostibarnü sangdong ka ajanga Kordofan tesem nunga el-Fasher nung atalokba ama lendong tulu ataloka nisung aika asütsü akok ta shir aliba mapang Skau-ia iba tekümdangtsü metetdaksüogo.

El-Fasher November ita matsüng tsünga UN-i, timtem lendong tulu ataloktsü ta tekümdangtsü metetdaksü, saka süoki ia magi. Iba yimti atsüngba sülen nisung noklang aika tepsetba temai adoka liasü aser iba ajanga UN tekolakba Antonio Guterres-i iba tesem ya "crime scene" ka ta ashitsüsa aküm.

Darfur aser Kordofan tesem nung nüburtem ayawara agi meneptsü ana nung aliba indang metetdakjatokogo.

Benin mitkari tashiyim amshia sorkar atsüngdoksü merangba nokdang

Porto-Novo, Luchii/December 07 (Agencies): Benin indang interior minister national TV nung adoka West Africa linük nung mitkar temi tashiyim amshia sorkar atsüngdoksü merangba nokdangtetogo ta sangdong.

Aji masüadang Lt-Col Pascal Tigri-i anir sepai telok kati TV nung sangdong ka agütsüba nung palnoki Tir Patrice Talon atsüngdokogo aser constitution agiener ta shia liasü.

Social media posts nunga Benin nung aliba Frence embassy ajanga Cotonou yimti nung tir aliba ki anasa prangbong ola angashiogo ta ashi, koba sorkar indang menden lir.

Tenük kuli alir temia parnoki prangbong khadokba ola angashiogo aser state broadcaster atema inyakba osangbener kar hostage ama ayu ta ashi.

Iba sülen presidential adviser kati BBC dang tir kumzüka lir aser French embassy nung lir ta ashi.

"Deobarnep, December 7, 2025, sepai telok tila kati sorkar aser institutions tashi mait

OFFICE OF THE
MERANGKONGTSÜR TELONGJEM
H.Q. MERANGKONG
Dist. Mokokchung, Nagaland.

TENÜNGSANG AGÜTSÜR

Merangkongtsür Telongjem Mongdangti ajanga 2025 Küm shirnokisa meranga inyakba nung takok tajung ngutetogo, nenok ajak nem tenungsang aser tetushi agütsür.

1. **Dr. MERENINLA SENLEM**, asür Dr. T Senlem aser asür Punala Senlem-er jala Principal Director, Department of Health and Family Welfare, Government of Nagaland jenjang atongba asoshi.
2. **Dr. MERENINLA P JAMIR**, PGT Sociology GHSS Tuli, "District Level Teachers' Award 2025" jenjang ngutetba asoshi.
3. **Wb. O. IMLIWATI**, Director, Department of Treasuries and Accounts jenjang atongba asoshi.
4. **Wt. LIMATULA YADEN**, Wb. Lanu Yaden kinungtsü, Minister (Customs) Permanent Mission of India (PMI) to the World Trade Organization (WTO) jenjang ngutetba asoshi.
5. **Dr. Merensangla Longkumer**, Wb. L Tali Longkumer jala Assistant Professor, Department of Rural Development and Planning, Nagaland University nung jenjang ngutetba asoshi.
6. **Sp. NUNGSHIKABA IMSONG**, Wb. Pangerlemba aser Wt.Dzuthore na jabaso Secretariat Assistant, Department of Personal and Administrative Reforms nung jenjang ngutetba asoshi.
7. **Dr. APANGJUNGBA**, Wb. N Temjen Jamir aser Wt. Bendangmenla na jabaso Ph. D, "Political Participation of Women in Nagaland: The Role of Customary Laws and Traditions" thesis nung ajmedaker Lovely Professional University, Punjab nungi anguba asoshi.
8. **Dr. PUNAZUNGBA IMSONG**, Wb. Jongpongyanger Imsong aser Wt. Chubarenla na jabaso Ph.D "Synthesis of Lanthanide Nanoparticles: Its' Characterization through Crystallography and Spectral Techniques along with their applications" thesis nung ajemdaker Nagaland University nungi anguba asoshi.
9. **Kr. LIMSEN IMSONG**, Wb. Lanunungsang aser Wt. Moabenla na jala HSLC 2025 tatidang nung 9 buba jenjang ngutetba asoshi.
10. **Kr. KUMSANGMENLA IMSONG**, Wb. Bendangnungba aser Wt. Chubainla na jala Nagaland University tatidang 2025 nung History paper nung 7 buba jenjang ngutetba asoshi.
11. **Kr. MERAINLA**, Wb. Imrongsangba aser Wt. Martsungla na jala Nagaland University tatidang 2025 nung Sociology paper nung 6 buba jenjang ngutetba asoshi.
12. **Sp. NUKSHIMEREN**, Wb. Alemttemjen aser Asür Moainla na jabaso Nagaland University B. Com tatidang 2025 nung 8 buba jenjang ngutetba asoshi.
13. **Kr. PANGERSANGLA**, Asür Bendangmongba aser Wt. Satemmonhla na jala Nagaland University tatidang 2025 nung Education paper nung 10 buba jenjang ngutetba asoshi.
14. **Sp. CHUBANUKSUNG LONGKUMER**, Wb. Imsutangit aser Wt. Sungjemrenla na jabaso Nagaland University tatidang 2025 nung General Paper nung 6 buba jenjang ngutetba asoshi.

Nenok wadang ajak nung Tsüngrem i maneni moajangma.

Sd/-
TSUKNUNGPENLA JAMIR
President
Merangkongtsür Telongjem

Sd/-
LEPZUNGSANGLA
General Secretary
Merangkongtsür Telongjem

kumdaktsütsü nükjidong nung anema nokdak," ta Interior Minister Alassane Seidou-i ashi. "Iba tensa nung Beninese armed forces aser parnok lenirtemi, parnoki azüngashia aliba ama, republic atema bendanga agütsür nokdaka lir. Parnoki telangzüba agütsüba ajanga parnoki tensa aziüktet aser merangba raksatsü," ta pai ashi.

"Anungji sorkari nüburtem dang pei mapa akhi ama inyaktsü ajungshir."

Cotonou nung helicopters senzüba nguogo aser lenmang tem nokdanga yimti nung aliba yimdong kar nung mitkar sashia liasü.

Benin ya taoba mapang French colony ka liasü, koba Africa nung democracy tashi taittiba linük ka ama züngshia aru.

Africa continent nung cotton timtiba iba linük nung adoker, saka alima nung tesensaktiba linüktem rongnung züngshir.

French aser Russian embassies ajanga pei nüburtem dang kilong nung alitsü ajungshia liasü.

US embassy ajanga

Cotonou, aser talisa tir aliba ki temeket nungi pila alitsü ashi. Sorkar atsüngdoksü merangba sepai lenirtemi Tir Talon-i linük junga ketdang masüba aija liasü.

"Army temi Beninese nüburtem nem putu tasen ka atema teimla agütsütsü asoshi inyaker, kong tejangraba kasa aliba, ochi obendang aser mapa inyakba nung takok alitsü," ta sepai kati sangdong ka zünga ashi.

Arishi küm 67 tain Talon ya West den tesendaktep tajung lir ta züngshir, aser pa kümsük tanabuba taruba küm tembanger Benin tir menden nungi alitutsü lir aser April ita elections agitsü.

Shishilempar Talon dang "king of cotton" ta ajar aser pa 2016 election nung takok ngua tir akum. Pai kümsük tasembuba meinyaktsü nangzüka lir aser pa melen Finance Minister Romuald Wadagni shimtsü shia lir.

Rongsenketzüng tsütsü terenlok aliba atema pa bhukumer temi Talon tenüng asanger, saka par sorkar anemer tem ajemrepba atema aitsür.

Inter Miami-i tang mezüngbuba MLS Cup kokogo



Luchii/December 7, 2025

(Agencies): Honibarnü Chase Stadium nung final nung Vancouver Whitecaps goal 3-1 agi akokba sülen Inter Miami-i tang mezüngbuba Major League Soccer (MLS) Cup kokogo. Asaya tatemi Rodrigo De Paul aser Tadeo Allende nati goal kaka idakja parnoki iba asaya kokogo. Asaya nung Messi-ia assist ana süja liasü.

Thomas Mueller asayaba Vancouver team-i asaya timba ka azioker asaya aser goal idaktsütsü atema maongka tajungba ngutet saka parnoki Messi-i aniba team mekoktet, shibai tang mezüngbuba MLS league title ka benogo.

"Iba ya onok nükjiding tongtibangtiba ka liasü," ta Messi-i ashi, shiba nem MVP agütsü.

"Taoba küm onok league nung mezüngbuba jenjang nung

tembang saka tia maka mezüngbuba round nung tsükatok. MLS akokba ya ajak dang tematiba. Team-i kanga meranga asayaogo," ta Messi-i ashi.

Asaya nung mezüngbuba goal ya minute tibuba nung Messi-i agütsüba ball ka Allende-i kanga junga idakja parnok tejakdang aküm.

Asaya tanabuba shilem nung Vancouver puri asaya azioker asaya aser ghonda ka ajungtsü lia Ali Ahmed-i parnok atema goal ka idakja kasasa aküm.

Ajisüaka minute 71buba Rodrigo De Paul-i Miami pur asoshi tanabuba goal idakja parnok maneni tejakdang aküm aser mapang apuloktsür asayaba mapang Allende-i par team asoshi tasembuba goal idakja parnoki asaya koka liasü.

Iba asaya ya Jordi Alba aser Sergio Busquets na asoshi tena

indang career nung tatembangbuba asaya liasü, aser takok nung tembangogo.

"Parnok atema ni kanga pelar. Pei career yamai takok nung tembangba ya ajak asoshi kanga tajung lir," ta Messi-i ashi.

Kasa mapang nung club kibur David Beckham-a asaya tembangba sülen ground telungi ia asayartem den benjungtepa liasü.

"Vancouver team nem tenüngsang agütsür, parnoki kanga junga asayaogo aser onok pressure nung toktsü. Parnoki goal idaktsüba sülen asaya amokbanger asaya liasü," ta Beckham-i ashi.

"Leo (Messi) nem ball agütsüra pai chance yanglur. Team-i longjemer asayaogo aser parnoki küm tepeyong yamaji asayaogo," ta paisha sem.

Australia-i tanabuba Ashes Test kokogo

Luchii/December 7, 2025

(Agencies): Gabba nung England aser Australia na tanabuba Ashes Test asaya Australia-i wicket ti agi koka parnok 2-0 agi tejakdang kümogo.

England team-i pink-ball asaya anogo pezübuba nung batting terabo jung amen saka Perth nung anogo ana nung dang mezüngbuba Test makokba sülen tanabuba Test nunga kanga mejungi tamakok nguogo.

Team-mates tem dang tatishitsü ka sayutsü atema temulungtetba tulu nung captain Ben Stokes-i kanga meranga asaya-a ball 152 nung run 50 yanglua liasü.

Stokes aser Will Jacks, shibai ball 92 nung run 41 yanglu, tenati over 36.4 nung run 96 yanglu, koba iba asayamung nung England team atema partnership talangtiba liasü.

Tena ghonda ka shi külemi asaya saka Australia captain Steve Smith-i first slip ball kanga junga ajepzüka Jacks out sütsü. Iba sülen England team

nungi tatembangbuba asayar pezü run 17dang yanglur out süatok. Parnoki asaya ajak out sür run 241 yanglua liasü.

Asaya akoktsü atema Australia team run 65 dang nüngdaka liasü. Atkinson-i Travis Head aser Marnus Labuschagne nabo out sütsü saka Australia-i iba asaya over 10 tsüngda koka liasü.

Iba asaya makokba sülen Stokes-i aniba team ya 2-0 agi tesülen kümogo aser iba asayamung akoktsü atema tanungba Test asemprongla akoktsü nüngdaker.

Taküm iba Ashes asayamung ya kanga dang yongya ata aliba asayamung ka aser England team asoshi 2015 küm sülen tang mezüngbuba iba asayamung akoktsü atema maongka tajung lir, saka Stokes-i aniba team ya Australia nung asayaba England team tamajungtiba ka akümstsü ana nung lir.

England aser Australia na tasembuba Test asaya Adelaide nung December 17 nü nungi tenzüka asayatsü.

Gary Kirsten Namibia tebur team consultant kümogo

Luchii/December 7, 2025

(Agencies): Taoba mapang World Cup akokba India team coach Gary Kirsten, Namibia tebur national team consultant asütsü shimogo aser pa head coach Craig Williams den taruba küm T20 World Cup tashi inyaktüsü.

Taruba küm World Cup ya India aser Sri Lanka na nung February aser March ita asayatsü. "Cricket Namibia den inyaktüsü ya maongka tajung ka lir. Cricket asaya ajungkettsü atema bendanga agüja inyakba aser temulungtetba tulu aliba ngua ni kanga atsüa aruogo," ta Kirsten-i ashi.

"State-of-the-art cricket stadium tasenba ya national team tem alima nung team tajungtibatem den sütepba toktepdaktsütsü asoshi parnok bendanga agütsür aliba kuli lir.

"Parnok indang senior tebur national team kanga junga asaya arudar aser taruba küm February ita T20 World Cup atema renemshiba mapang teyari agütsütsü yongya atar," ta pai ashi.

Kirsten ya taoba mapang South Africa team nungi opener ka liasü aser 2004 küm asaya nungi anisüngzüka sülen pa 2007 küm India team head coach asütsü shim. Pa lenisüba nung India team-i 2011 küm ODI World Cup koka liasü.



Iba sülen pa South Africa team head coach aküm aser linük balala nung T20 franchise league tem nung team balala nung coach mapa inyaka aruogo. Tesüsa pa 2024 küm mapang tatsüka asoshi Pakistan tebur team head coach liasü.

"Consultant ama Kirsten shimba ajanga high-performance environment tashi itshitsü aser tang aliba coaching structure nongita yaritsü atema Cricket Namibia bendanga agütsür aliba sayur," ta board sangdong ka ajanga metetdaktsü.

"Pa asayar aser coach ama international jenjang nung tajangshiba aika bena aliba nisung ka lir asünung pai team nem teyari tulu agütsütsü," ta kasa sangdong ajangsa metetdaktsü.

Namibia team 2021, 2022 aser 2024 küm T20 World Cup atema qualify süogo aser taruba kuma asayatsü.

Saraswat-i Guwahati Masters nung mezüngbuba super 100 title benogo

Guwahati, Luchii/December 7 (Agencies): Rajasthan nungi badminton asayar Sanskar Saraswat-i Deobarnü Guwahati Masters final nung külem India nunger asayar Mithun Manjunath koka tang mezüngbuba Super 100 title ka benogo.

Jodhpur nungi arishi küm 19 tain asayar yagi kanga tashi ita asaya-a taoba mapang national champion Manjunath 21-11, 17-21, 21-13 agi koka liasü. Tena tsüngda final asaya minute 50 asaya liasü.

Saraswat, shiba Guwahati nung National Centre of Excellence nung training agir, pa domestic circuit nung kanga kara renloka odar. Pai mezüngbuba senior national doubles title taoba küm Bengaluru nung Arsh Mohammad den külemi benogo aser taoba mapang junior asayamunga ka kokogo.

Tena ya taoba küm September ita 31buba Smit Krishna Khaitan Memorial Badminton Tournament nunga under-19 asaya nung runners-



up liasü.

Final asaya tenzüker Saraswat tera agi tejakdang sür asayayonga atu saka Manjunath-i pa mepena point 7-7 aküm. Tena rally talanglabo masaya saka kati ka aibelen nungi ajangzüka liasü.

Break tashi nung Saraswat 11-9 agi tejakdang liasü aser iba sülen pai Manjunath nem point ana dang ngudaktsü aser mezüngbuba game akok.

Tanabuba game nunga Saraswat-i maneni attack süa asaya aser pa 8-2 agi tejakdang aküm. Ajisüaka Manjunath-i kanga meranga asaya tur break

tashi nung pa 11-10 agi tejakdang aküm.

Iba sülen paisha tajungba asayateta 18-16 agi pa tejakdang aküm aser mapang tatsüka dang lir asaya kokatok.

Tasembuba game nung Saraswat-i kanga junga asaya tenzüker aser pa 7-0 agi tejakdang aküm. Manjunath-ia point ishika ngua terabo menepa atu saka break tashi nung Saraswat 11-5 agi tejakdang liasü.

Asaya tenzüker shiba sülen Saraswat-i maneni attack süa asaya aser match points ti anguba sülen asaya 21-13 agi ayong ayonga koka liasü.

BILEMDANGANG

"Nai melenshinüa mebilemra memelenshitettsü."